

'A cchi servi a' meravigghja, se ?

Ma quantu 'nni scammentunu,
ranni Diu, chi meravigghja,
si po' jiàpriri na potta senza manigghja,
basta ca tu t' avvicini 'a idda.
Si vinissuru i nostri nunnavi
nu 'ssimpucu ci viniria su du' pedi.
Si poi, vutannu fogghiu, vaddamu u' celu,
vidennu n'arioplanu vulari
nta 'llaria chinu i' genti,
ti ponnu vènniri sicuru sbinimenti.
No parramu poi di navi i' crucera
comu palazzuni chi girunu pi' mari,
chi sulu vaddannuli ti fannu 'ttirri,
pinsannu ca' si ponnu 'nfunnari.
U' prugressu a' unni 'nni puttavu
e 'nveci i' ludari Diu chi 'nnu dunavu
ddivintammu peggju di 'nnimali,
supebbi, nniricati e sciarridderi
e no sapemu cchjiù né cianciri né amari.